



Ingerlatseqatigiiffimmik Namminersorlutik Oqartussat aalajangiisuusumik sunniuteqarfigisaanik aatsitassanut suliniutinik pilersarusiornermik qalluinermillu siunertaqartumik pilersitsinissaq pillugu Naalakkersuisut kingusinnerpaamik UPA2020-mut nassuiaammik saqqummiussinissaat pillugu Inatsisartunut aalajangiiffigisassatut siunnersuut. Nassuiaammi ilanngullugu ingerlatseqatigiiffimmut aningaasalersueriaatsit piginneqatigeeriaatsillu ilanngunneqarnissaannik Naalakkersuisut kissaateqarfigineqarput. Nassuiaammissaaq aatsitassanut suliniutinut qanoq annertussusilinnut ingerlateqatigiiffiup aningaasalersuinissaanik piviusunngortitsinissaanullu siunnerfilerneqarnissaa ilanngullugu eqqarsaatigineqassaaq.

(Inatsisartunut ilaasortaq Aqqaluaq B. Egede, Inuit Ataqtigiit)

(Siullermeerneqarnera)

Isertorneqarsinnaanngilaq Demokraatini illersoratsigu kiffaanngissuseqarluni niueqatigiissinnaanneq aamma kiffaanngissuseqarluni aningaasarsiortoqarsinnaanera. Pissutsit amerlasuut pissutigalugit taamak isumaqarpugut. Pingaarnersaavorlu atorsinnaammata. Tassa imaappoq nioqqutissiaq iluanaarniutigalugu nioqqutigineqarsinnaappat taava namminersortunik aningaasaleerusussuseqartoqassaaq - iluanaarutigalugulu - tunisassiaq.

Tamannaannarlu pissutigalugu pisortat mianersuutigilluinnartariaqarpaat ingerlatsivimmik pilersitsiniarnissartik immikkoortuni namminersortut soqutigilaarsinnaasaanni imaluunniit soqutiginnngisaanni. Soqutiginnnginnermummi qularnanngitsumik pissutaalluarsinnaavoq immikkoortup aningaasarsiutigineqarsinnaannginnera. Pisorallu ingerlatseqatigiiffiliussagaluarpata qularutigineqassanngilaq annaasaqartoqarumaartoq.

Tamatta eqqaamagunaqaarput taamani pisortat upperileraluallarmassuk puisit neqaanik pølsiliat iluanaarutigineqarsinnaasut? Taamaattoqanngilarli aamma tamanna akileraartartunut akisoorujussuusimavoq.

Allatut oqaatigalugu pisortat sapinngisamik niuertutut ingerlatsinaveersaartussaapput.

Manna siunnersuut aqqutigalugu IA-p kissaatigaa Ingerlatseqatigiiffimmik Namminersorlutik Oqartussat aalajangiisuusumik sunniuteqarfigisaanik aatsitassanut suliniutinik pilersarusiornermik qalluinermillu siunertaqartumik pilersitsinissaq-

Demokraatini eqqisseqqinnaarluta eqqaasitsissutigissavarput, ingerlatseqatigiiffik assigusoq -
– Nuna Minerals – ukiut marlussuit matuma siorna akiliisinnaajunnaarluni uninnikummat. Taava suna



pissutigalugu IA-p upperilersimanerpaa ingerlatseqatigiiffik assigusoq massakkut ingerlalluarsinnaalerumaartoq. Akissutip tusarnissaanut qilanaarpunga.

Demokraatini kissaatiginngilarput pisortat ingerlatseqatigiiffiik amerlanerusunik pilersitsisoqarnissaa - paarlattanilli pioreersut ikilisarussuppagut. Aamma suli amerlanerusunik pisortat ingerlatseqatigiiffiik pilersitsinissamut nassuiaasiornissaq akissajaatigerusunnigilarput, pisariaqanngimmat.

Taamatut oqaaseqarluta siunnersuutip itigartinneqarnissaa inassutigaarput.